



CONVENIO DE COLABORACIÓN ENTRE A EXCMA. DEPUTACIÓN PROVINCIAL DE PONTEVEDRA E O EXCMO. CONCELLO DE VIGO PARA POTENCIAR A POSTA EN VALOR DOS RECURSOS TURÍSTICOS CON MEDIDAS DE APOIO AS ACTIVIDADES DE DIVULGACIÓN DA OFERTA TURÍSTICA E DE MELLORA DA PROMOCIÓN DOS VALORES TURÍSTICOS DE VIGO, AS RÍAS BAIXAS E A PROVINCIA DE PONTEVEDRA.

En Vigo, 28 de setembro de 2016

### REUNIDOS

Dunha parte, Dona María del Carmen Silva Rego, Presidenta da Deputación Provincial de Pontevedra, na representación legal que da mesma lle atribúe o artigo 34.1.b) da Lei 7/1985, de 2 de abril, Reguladora das Bases de Réxime Local.

Doutra, Don Abel Caballero Álvarez, Alcalde-Presidente do Concello de Vigo, na representación legal desta Administración municipal, que lle atribúe o artigo 124.4.a) do mesmo texto legal.

Recoñécense mutuamente os comparecentes a capacidade e a representación necesaria para a sinatura do presente convenio de colaboración, e a estes efectos

### EXPOÑEN

I.- Que, no exercicio das súas respectivas competencias, a Deputación Provincial de Pontevedra e o Concello de Vigo, con data 20 de novembro de 2015, asinaron un PROTOCOLO de colaboración en orde a afondar na colaboración administrativa entre ambas institucións e, especialmente, para a cooperación na planificación e execución dos proxectos e actuacións que no propio Protocolo se sinalan; actuacións e proxectos entre os que se inclúen nos que ao presente convenio importan.

II.- Que no devandito Protocolo de colaboración convense que as distintas actuacións previstas desenvolveranse a través de convenios específicos, cuxa execución administrativa, técnica e contractual corresponderá ao Concello de Vigo, que deberá observar os procedementos de avaliación e seguimento da execución dos convenios a establecer nestes.

III.- Que no apartado IV.5 do citado Protocolo expónse que en materia de Turismo o Concello de Vigo desenvolverá actuacións para potenciar a posta en valor dos recursos turísticos do



municipio e o seu entorno con medidas de apoio ás actividades de divulgación da oferta turística e de mellora da promoción dos valores turísticos.

IV.- Que atendendo ao disposto no artigo 25.2.h da Lei 7/1985, de 2 de abril, reguladora das bases de réxime local, o municipio exercerá en todo caso como competencias propias, nos termos da lexislación do Estado e das Comunidades Autónomas, nas materias de información e promoción da actividade turística de interese e ámbito local. No mesmo senso, a Lei 7/2011, de 27 de outubro, de turismo de Galicia sinala como administracións públicas en materia de turismo ós concellos no seu artigo 3 e máis adiante, no seu artigo 5, volve incidir en que lle corresponde ós concellos, sen prexuízo das competencias establecidas pola lexislación de réxime local, a protección e a promoción dos recursos turísticos do seu termo municipal.

Pola súa banda a lexislación vixente en materia de réxime local, concretamente no artigo 31 da Lei 7/1985, de 2 de abril, encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e cooperación económica ós concellos.

V.- Que, de acordo coas precedentes consideracións e en desenvolvemento do Protocolo de colaboración citado anteriormente, que contempla como un dos seus obxectivos estratéxicos o apoio ás iniciativas de cualificación da promoción turística, acordaron aprobar o presente convenio de colaboración, que asinan os comparecentes, con arranxo aos seguintes.

## PACTOS

### PRIMEIRO: OBXECTO DO CONVENIO

É obxecto deste convenio establecer e concretar o réxime de colaboración entre ambas administracións locais para o financiamento da contratación dos servizos de promoción turística de Vigo, as Rías Baixas e a provincia de Pontevedra en mercados turísticos vinculados coas operacións das rutas Vigo-Valencia, Vigo-Palma de Mallorca e Vigo-Ibiza, é dicir no mercado turístico mediterráneo peninsular e insular español. As accións a desenvolver implementaranse procurando a atracción de turistas de diferentes perfís e segmentos centrándose principalmente no turismo de escapada (citybreaker), negocios, cultural, familiar, xuvenil, gastronómico, de eventos e reunións.

### SEGUNDO: FINANCIAMENTO DO CONVENIO

As actuacións ás que se refire o presente convenio serán financiadas pola Deputación Provincial, e obrígase a sufragar o custe das prestacións obxecto das contratacións ata a



cantidade máxima de SETECENTOS TRINTA E SEIS MIL EUROS euros (736.000,00 €), para o conxunto dos contratos de promoción turística que se estenderán aos anos 2016-2019.

### TERCEIRO.- EXECUCIÓN DO CONVENIO

1º.- A execución do presente convenio e o seu financiamento pola Deputación Provincial terá lugar có seguinte desglose:

ANUALIDADE	TOTAL	% ANUALIDADE
2016	37.000,00 €	5,02 %
2017	233.000,00 €	31,66%
2018	233.000,00 €	31,66%
2019	233.000,00 €	31,66%
<b>TOTAL</b>	<b>736.000,00 €</b>	<b>100%</b>

Non obstante, o eventual reaxuste da anualidade da execución de dito contrato, provocará o reaxuste das anualidades do presente convenio, a cuxo efecto o Concello de Vigo, previa proposta da Comisión de Seguimento do convenio dará audiencia á Deputación Provincial no expediente que se inicie para o reaxuste das anualidades do contrato e das resolucións que se diten.

2º.- O Concello facilitará os pregos administrativos e técnicos e a copia do contrato á Deputación para o seu coñecemento.

3º.- Formalizado o contrato, remitirase unha copia á Deputación Provincial e comunicarse a esta Institución a data e a hora en que terá lugar a súa sinatura, á que asistirá, de consideralo procedente, un representante da Corporación provincial.

4º.- A Administración municipal remitira á provincial, anualmente, as sucesivas facturas polos servizos prestados que expida a empresa adjudicataria, xunto coa certificación da súa aprobación polo órgano correspondente. A cantidade correspondente a cada factura será reembolsada ao Concello de Vigo pola Administración provincial.

5º.- A Deputación Provincial poderá inspeccionar as actuacións obxecto do presente convenio cando o teña por conveniente, así como formular as observacións que estime pertinentes, sen prexuízo de que corresponda en exclusiva ao órgano de contratación e aos responsables dos respectivos contratos a emisión das ordes e instrucións que procedan.

### CUARTO.- COMPROMISOS DO CONCELLO

O Concello de Vigo obrígase a:



- Contratar o desenvolvemento de accións de promoción turística. A través deste contrato búscase reforzar a atracción de novos turistas procedentes do mediterráneo español peninsular e insular de interese para as Rías Baixas e a provincia de Pontevedra.
- Redactar e aprobar o/s correspondente/s proxectos técnicos, pregos de cláusulas ou documentos análogos que conteñan as condicións do/s contrato/s de promoción turística obxecto do convenio, debendo remitir un exemplar aprobado á Deputación Provincial.
- Obter os correspondentes permisos e tramitar ante outros organismos as autorizacións pertinentes que fosen precisas.
- Licitar, dirixir, executar, e controlar e os servizos segundo os correspondentes proxectos técnicos, pregos de cláusulas ou documentos análogos que conteñan as condicións de prestación dos servizos obxecto do convenio.
- Remitir, unha vez formalizado, unha copia do contrato de promoción turística á Deputación Provincial.
- Xustificar perante a Deputación os servizos executados mediante a presentación das correspondentes facturas, ou documentos análogos acreditativos do gasto efectuado, aprobadas polo órgano competente do Concello; aboándose o importe total da anualidade de que se trate. Asemade, para a correcta xustificación o Concello deberá presentarm, anualmente, a seguinte documentación:
  - o Memoria da actividade que se realizou e dos resultados obtidos debidamente asinada.
  - o Conta xustificativa que relacione os gastos da actividade subvencionada.
  - o Declaración responsable de que os gastos e ingresos que figuran na conta xustificativa se destinaron á actividade obxecto do convenio.
  - o Declaración responsable dos ingresos obtidos e de as subvencións ou axudas obtidas non superan o custe da actividade.
  - o Calquera outra documentación esixible pola normativa vixente para a correcta xustificación deste convenio ou que se considere necesaria para a comprobación da correcta execución do obxecto do convenio.
- Dar a adecuada publicidade a este convenio, de tal xeito que quede constancia que a prestación dos servizos obxecto do mesmo levouse a cabo en colaboración coa Deputación de Pontevedra.
- Destinar os fondos percibidos ó obxecto concreto para o que foron concedidos.



- Comunicar á Deputación de forma inmediata, a obtención doutras subvencións ou axudas para a mencionada finalidade procedentes de calquera administración pública ou ente privado nacional ou internacional, con expresión da súa contía.
- Prestar a colaboración e facilitar canta documentación lle sexa requirida no exercicio das funcións de fiscalización e control do destino das axudas que lle corresponden á Intervención Provincial, ó Tribunal de Contas e ao Consello de Contas.

Asemade, o Concello de Vigo comprométese ao cumprimento das obrigas contidas na Lei 9/2007, do 13 de xuño, de Subvencións de Galicia e en especial as recollidas no artigo 11 da mesma. Tamén será de aplicación o establecido no Decreto 11/2009, do 8 de xaneiro, na Lei 38/2003 Xeral de Subvencións e no seu regulamento, aprobado polo Real Decreto 887/2006, de 21 de xullo.

#### **QUINTO.- COMPROMISOS DA DEPUTACIÓN**

A Deputación de Pontevedra comprométese a financiar os custes derivados das contratacións dos servizos obxecto do convenio, ata a cantidade máxima de SETECENTOS TRINTA E SEIS MIL EUROS (736.000,00€), de conformidade co disposto na cláusula segunda, que será librada contra a presentación das correspondentes facturas ou documentos análogos acreditativos do gasto efectuado, e na parte proporcional do financiamento, así como da restante documentación xustificativa necesaria e logo da súa fiscalización pola Intervención provincial.

O pagamento das diferentes prestacións obxecto do convenio realizarase, contra a aplicación 16/942.9420.462.14 do vixente orzamento provincial no que se refire á anualidade 2016. As achegas correspondentes ós exercicios seguintes 2017, 2018 e 2019 quedarán condicionadas á dispoñibilidade orzamentaria de cada anualidade e realizaranse, no seu caso contra as aplicacións que correspondan.

A Deputación Provincial someterá os pregos de cláusulas administrativas e técnicas, ou os documentos análogos que conteñan as condicións do contrato de promoción turística obxecto deste convenio á supervisión e comprobación dos seus servizos técnicos, e se o estima oportuno, poderaos someter á aprobación do órgano de goberno que corresponda, coa finalidade de autorizar as actuacións previstas nos mesmos.

A Deputación Provincial poderá inspeccionar a execución dos servizos obxecto do presente convenio e formular as observacións que estime pertinentes, sen prexuízo de que corresponda en exclusiva ao órgano de contratación e aos responsables dos respectivos contratos a emisión das ordes e instrucións que procedan



Non obstante, as actuacións estarán sometidas á comprobación explícita da execución dos servizos por parte dos servizos técnicos da Deputación Provincial.

**SEXTO.- PUBLICIDADE**

En toda a documentación e informacións relativas ás actuacións de promoción turística incluírase a imaxe corporativa que a este fin facilite, en todos os formatos, a Deputación Provincial de Pontevedra.

As accións de promoción a desenvolver no marco do convenio que terá por obxectivo procurar atraer a turistas de diferentes perfiles e segmentos á cidade de Vigo, ás Rías Baixas e Provincia de Pontevedra deberán garantir un alto impacto e visibilidade da colaboración prestada pola Deputación de Pontevedra.

En todas as accións de comunicación incluíranse imaxes promocionais do destino Rías Baixas coa estratexia de posicionamento da marca Rías Baixas e da provincia de Pontevedra.

Por outra parte, en cumprimento do establecido na resolución de 10 de decembro de 2015, da Intervención Xeral da Administración, do Estado pola que se regula o proceso de rexistro e publicación de convocatorias de subvencións e axudas no Sistema Nacional de Publicidade de Subvencións, e, en aplicación dos principios recollidos na Lei 19/2013, de 9 de decembro, de transparencia, acceso á información pública e bo goberno, a Base de Datos Nacional de Subvencións operará como sistema nacional de publicidade das subvencións. A tales efectos e para garantir o dereito dos cidadáns a coñecer todas as subvencións convocadas en cada momento e cara a contribuír ós principios de publicidade e transparencia, a Intervención Xeral da Administración do Estado publicará na súa páxina web as subvencións concedidas, segundo o establecido nos artigos 20.4 e 20.8.b da Lei 38/2003, de 17 de novembro, xeral de subvencións.

**SÉTIMO.- COMPATIBILIDADE CON OUTRAS SUBVENCÍONS**

Conforme o disposto no artigo 40.1º, letra d) do Decreto 11/2009, de 8 de xaneiro, polo que se aproba o regulamento da Lei 9/2007, de 13 de xuño, de subvencións de Galicia, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou e organismos internacionais.

Porén, o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo das contratacións subvencionadas.

**OITAVO.- COMISIÓN DE SEGUIMIENTO**

Para o seguimento e coordinación da execución deste convenio e resolución das dúbidas que poidan producirse na súa interpretación crearase unha comisión integrada por tres representantes de cada unha das Administracións asinantes, un dos cales terá carácter técnico.

Corresponderá á Comisión de Seguimento:

- A puntual recepción de información sobre todas as actuacións que se produzan na execución dos contratos a que este convenio se refire
- A coordinación entre as administracións asinantes na execución e financiamento do convenio, ditando ao efecto as instrucións oportunas
- A resolución das dúbidas que presente a interpretación do convenio e, no seu caso, a emisión de informe se a dúbida ten de ser resolta polos órganos de goberno das administracións asinantes.
- A emisión de informe en relación coa necesidade do reaxuste da anualidade do convenio e en relación con cantas incidencias se produzan na execución dos contratos a que este se refire.
- A formulación das propostas que procedan en relación ás cuestións a que os seus informes se refiran.

A Comisión de Seguimento reunirse cando o estime conveniente o seu responsable, por decisión propia ou a petición de calquera dos seus membros, e en todo caso unha vez ao mes. As súas reunións terán lugar na Casa do Concello de Vigo. Na reunión constituínte da Comisión de Seguimento designarase ao seu responsable e ao seu secretario que levantará acta das súas reunións.

**NOVENO.- VIXENCIA**

O presente convenio producirá os seus efectos desde a data da súa sinatura ata a total execución dos contratos a que o mesmo se refire, sen que en ningún caso o seu prazo de vixencia poida superar o 31 de decembro de 2019.

**DÉCIMO.- EXTINCIÓN DO CONVENIO**

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causas de resolución:

- 1º.- O transcurso do prazo máximo de vixencia do convenio.



2º.- O acordo unánime dos asinantes.

3º.- O incumprimento das obrigas e compromisos asumidos por parte dalgún dos asinantes.

Neste caso, notificarase á parte incumpridora un requirimento para que, no prazo que se sinale, cumpra coas obrigas ou compromisos que se consideran incumpridos. Este requirimento será comunicado tamén ao responsable da Comisión de Seguimento.

Se transcorrido o prazo indicado no requirimento persistira o incumprimento, a parte que o dirixiu notificará á outra parte a concorrencia de causa de resolución e entenderase resolto o convenio. A resolución do convenio por esta causa poderá dar lugar a indemnización dos danos e perdas causados.

4º.- Por decisión xudicial declaratoria da nulidade do convenio.

5º.- Por calquera outra causa distinta das anteriores prevista no convenio ou noutras leis.

6º.- Polo incumprimento do contrato por parte da empresa adxudicataria.

#### **UNDÉCIMO.- RÉXIME XURÍDICO.**

O presente convenio ten natureza administrativa e rexerese pola Lei 38/2003 do 17 de novembro, xeral de subvencións e o RD 887/2006, de 21 de xuño, polo que se aprobou o seu regulamento, nos seus preceptos básicos; a lexislación básica do Estado en materia de réxime local; a Lei 9/2007, de 13 de xuño, de subvencións de Galicia; os preceptos non básicos da Lei 38/2003 e do RD 887/2006; polos pactos que se conteñen neste convenio; as Bases de Execución dos orzamentos das Administracións asinantes e as restantes normas de dereito administrativo, e no seu defecto, as normas de dereito privado.

O Alcalde-Presidente do Concello de Vigo

A Presidenta da Deputación de Pontevedra

Asdo.: Abel Caballero Álvarez

Asdo.: M<sup>a</sup> Carmem Silva Rego

A Secretaria do Concello de Vigo,

A Secretaria accidental da Deputación de Pontevedra,

Asdo.: M<sup>a</sup> Concepción Campos Acuña

Asdo.: Sonia Mateos Escudero